

— Ես գիտեմ մի այլ, անելի ցաւալի կորուստ, — ասաց Յայրիկը տխուր ծայնով եւ պատմեց հետեւեալ անցքը.

Մի անապատում, որ հայոց ծովակներից մէկի կղզում է գտնուում, յանկարծ միաբանութիւնը լսում է, որ կաթողիկոսը գալիս է վանքը եւ, որպէսզի նորին վեհափառութիւնը վանքի գրքերը իրանց ողորմելի դրութեան մէջ չտեսնէ, հաւաքում են բոլորը, լցնում են կթոցների մէջ եւ թափում են ծովը: Երբ նորին վեհափառութեան նաւակը մօտենում է կղզուն, նա նկատում է, որ մագաղաթի թերթիկները ջրի երեսին լողում են: Ալիքները նրանցից մէկը բերում է եւ խփում վեհափառի նաւակի կողքին: Նա ձեռքը մեկնում է եւ վեր է առնում դժբախտ թերթը: Պատահմամբ դա լինում է Խորենացու գրքի հէնց այն կտորը, որտեղ գրած է լինում նրա սգաւոր ողբը, որի մէջ նա այնքան դառն կերպով նկարագրում է իր ժամանակի եկեղեցականների անպիտանութիւնները: Վեհափառի հանդէպ, նաւակի մէջ, նստած է լինում կղզու վանահայրը, որ դուրս էր եկել ցամաքը նրան ընդունելու: Վեհափառը տալիս է նրան կարդալու սգաւոր ողբի հետեւեալ տողերը. «Վարդապետք տիւմարք» եւ այլն:

— Այդ պատմութիւնը որքան հետաքրքիր, այնքան եւ տխուր է, — ասաց Ասլանը: — Բայց ես լսել եմ, որ ձեր կաթողիկոսներից մէկը նոյնպէս ազատ չէ եղել մի այդ տեսակ մեղքից. նա իր նախորդների յիշատակները ոչնչացնելու համար այրել է տոեւ նրանց գործերի բոլոր ատենական թղթերը: Բայց ես շատ ուրախ եղայ, որ ձեր ցուցակի մէջ գտայ, բացի գրքերի անուններից, եւ մի ամբողջ շարք զանազան կոնդակների, զանազան հրովարտակների, պարսից եւ տաճկաց թագաւորներից ստացոած, զանազան պայմանագրերի եւ հին կալածագրերի, այդ բոլորը կարող է առատ նիւթ տալ պատմութեան:

Մատենադարանի մի առանձին պահարանում հաւաքոած էին հայոց ամենահին տպագրութիւնները, որոնք եղել են մի քանի դարեր առաջ Վենետիկում, Ղոմում, Միլանում, Նոր-Ջուղայում, Ամստերդամում եւ այլ տեղերում:

Գրչագրերը քննելուց յետոյ մտանք երրորդ սենեակը, որ անելի ընդարձակ էր, քան առաջինները:

— Այդ մեր թանգարանն է, — ասաց Յայրիկը, — բայց դեռ աղքատ թանգարան, որովհետեւ շատ ժամանակ չէ, որ գոյութիւն ունի:

Չնայելով, որ Յայրիկը խիստ համեստութեամբ էր վերաբերում դեպի թանգարանը, բայց այդ սենեակը, անելի քան միւսները, գրաւեց իմ ուշադ-